



風陵文庫  
文庫19  
F297  
7





長春道教源流卷七

羅浮醮醪洞主陳教友著

邱長春後全真法嗣紀略

醮醪洞主曰今世全真教大抵長春法嗣爲多所謂龍門派也然詢之道教中人云嗣馬丹陽者爲遇山派嗣譚長真者爲南無派嗣劉長生者爲隨山派嗣王玉陽者爲崑崙派嗣郝廣益者爲華山派嗣孫清靜者爲清靜派考長春及諸真門人無有以派名者諸派之興其起於明代歟惟元時北方全真教長春與諸真遞相傳授尙可考見厥後自北而南地與世相去日遠李道謙後纂輯無人世但知爲全真教無有識其淵源者矣不

特此也當明之世全真之顯著者多出南方而北方無聞焉豈元末北方大亂於時宮觀殘燬徒衆星散遂爾失傳耶明何喬遠名山藏稱歲辛丑高皇帝取江西天師張正常遣使上牋陳天命之符乙巳朝京師既卽位入見授真人領道教事是江以南正一教入明不廢而洪武元年元順帝出奔後長春法嗣未聞有復令掌教者北方全真之不振實由於此續文獻通考稱洪武十五年改立教院爲道錄司設左右正一演法至靈玄義職專掌道教事道士有二等一曰全真二曰正一是當時全真仍比正一爲盛特旣無掌教爲全真者非兼通正一不能授官故明中葉後南方之全真亦微逮我

國朝天師之職雖令傳襲非所尊貴於是道教乃大屈匪惟全真卽正一之學亦無有練習之者矣夫正一之教以齋醮符籙爲宗非若全真之練心繕性期於證道曰全真雖微而山林隱逸之士或借以脫桎梏而治其身其徒所立宗派亦至今不絕於天下然立派雖殊所學則一茲篇所錄旣不能得其師傳故但統之曰全真教卽龍門爲長春的裔亦不復分析於其間惟是其教旣屈知之者希元末明初尙得大凡至我朝而士大夫無復紀述不能詳矣

魯大宥號洞雲子隨州應山人家世宦族初入武當山學道草衣菲食四十餘年天兵破襄漢大宥去渡河訪道全

真西絕汧隴北逾陰山至元十二年歸與汪貞常等修復  
五龍紫霄壇宇以道著遠近點墨片紙可療異疾救災捍  
患預知禍福時人神之度徒衆百餘人後獨結茅南巖或  
請作宮庭曰非爾所及也其人將至矣二十一年九月張  
守清自陝西來年三十一願爲弟子大宥欣然曰吾遲子  
久矣卽授以道要踰年春正月大宥遂化化之日面若童  
顏時以爲證道得仙云元程鉅夫大天一真慶萬壽宮碑  
參武當山志傳○武當山在湖北  
均州立武降神之地宋時加封立岳元陷襄陽在世祖至  
元十年續文獻通考稱喬潛道弟子吉志通居武當蓋在  
襄陽未陷時大宥當先聞全真之學於志通其後西絕汧  
隴北踰陰山則長春弟子演教之地也武當傳全真教蓋  
自大宥始元史程鉅夫名文海以字  
行家建昌官至平章政事卒諡文憲

汪貞常名思真號寂然子家世徽人宋丞相汪伯彥之後

生於安慶嗣全真教法入武當山至元乙亥領徒衆六人

開復五龍荆榛塞途黑虎爲之引導興建殿宇四方禮之

度徒衆百餘人任本宮提點吉凶預知後無疾而蛻俗民

多夢其步紫雲而北去武當山志

張道貴名雲巖號雷翁長沙人至元間入武當禮汪真常

爲師又同葉雲萊劉洞陽謁雷因黃真人得先天之道歸

五龍宮潛行利濟門下嗣法者二百餘人得其奧旨惟張

洞因焉終於自然庵武當山志○武當山志又云葉雲萊

裔劉洞陽名道明荆門人二人同師雷因黃真人得清微

道法居五龍觀又元揭傒斯大五龍靈應萬壽宮碑云山

多神宮其大者有三曰五龍曰紫霄曰真慶大宗師張留

孫初總攝江准荆襄道教奏以其山葉希真朝觀天子大

信其道至元二十三年詔改其觀爲五龍靈應宮以希真

主之考道藏目錄有清微神烈秘法二卷清微元降大法

二十五卷清微齋法二卷皆言祈禱符籙及五雷等法又清微仙譜一卷云以天師為法錄傳教之祖然則先天之道即清微上道實正一派也黃雷困未詳魯大有汪貞常俱全真弟子張道貴師貞常而學於雷困蓋全真而兼正一派者逮張洞因而所學大行於是武當遂為全真別派

酥醪洞主曰 四庫提要云清微仙譜一卷元陳采撰采建安道士是書自序道教始於元始一再傳至老君分為四派曰真元曰太華曰關今日正一十傳至清微侍元昭疑元君復合於一元君零陵女子也繼是八傳至混隱真人南公南公傳雷困黃先生黃傳之於采因著是譜其所序四派傳授亦不甚明了大概今所云全真者乃關令派張道陵者乃正一派也考道藏目錄言清微道宗以元始上帝為祖初派玉晨大道君次派靈

寶天尊列派元元老君嗣派正一淵源以天師為法錄傳教之祖是清微道宗專為正一教而立采云老君分為四派十傳至元君而復合者蓋采學於黃雷困疑雷困雖通正一之術然出自全真派不淵源於張道陵故采為是言提要謂其所序傳授不甚明了以此漢天師世家所序傳授甚分明其不明了者然提要謂全真乃關令派當謂真元太華關令三派也考他書俱無此文疑因全真教起自關中而誤張守清名洞因號月峽叟宜都人幼習舉子業未成棄去更為縣曹掾年三十一歎曰河清可待人壽幾何奈何不早為計聞魯洞雲名投禮出家洞雲傳以道要踰年仙去守清躬執耕爨墾山鑿谷種粟為食繼帥其徒翦薈翁驅

鳥獸通道南巖卽巖構虛夷宮歷二十餘載乃成後由張  
雲巖復得葉雲萊劉洞陽之道至大三年皇后聞其道行  
遣使命建金籙醮皇慶元年春京師不雨召守清至禱而  
雨踰年春不雨禱而雨又禱又雨兩宮大悅賜號體玄妙  
應太和真人賜虛夷宮額曰天一真慶萬壽宮置提點甲  
乙住持延祐元年奉旨乘騎奉香還山致祭管領教門公  
事守清閭疏果毅方嚴質茂雖大祠祭不待沐浴更衣所  
感必應後退隱於清微妙化巖精修上道棄形蛻去元程  
大天一真慶萬壽宮碑參荆州府志武當山志○元范梈  
有送張煉師歸武當山詩張君瀛洲人來作武當客始來  
武當時祇著謝公屐弟子百數輩稍稍來服役茅立萬  
柱空中現金碧辛苦三十年夜卧不側席以之律鬼神故  
亦知矩墨元年踰冬早失火燒四國野谷方焦熬六月畿  
甸赤朝廷亦不愛犧牲與圭璧僵巫暨僊史歌舞無消息

君時待詔來公卿初不識一朝傳天語問以濟旱策君云  
臣鄙愚造化非所測陰陽有開閉此實智者責公卿復致  
辭物生今孔棘已勅京兆尹取足輸粟帛此如解倒懸祀  
事惟所擇君聞猶固讓心實內憂揚飛章白玉關瀝瞻礮  
悃幅臣實才淺勤臣實學進塞臣有一寸心願輔后皇德  
后皇本愛民民今旱爲厄或者罪有由皇亦重開釋祈謝  
各有方呪禁各有式上堂薦明水下堂考金石夜分請命  
既味爽大施設爲壇東市門經紀法靈冊庭中立武旗飄  
飄墨黍黑君臨一揮手怒髮上霄直指麾東方龍卷水東  
海側指麾西方龍卷水略西極北南暨中央各以方率職  
某日某甲子漏下五刻刻我在壇上伺不得忤區畫豐隆  
與飛廉列缺與辟應汝將汝風馳汝遣汝雷擊汝雲馮勿  
滴汝雨必三尺汝不從誓言不與上帝救至期果響答動  
盪七日澤常時人所難君若不與力公卿奏天子是必有  
褒錫可以寵號名可以蕃服君曰天子聖卿從誠所格  
臣敢貪天功况乃歸計迫昨得山中書至自青溪宅向來  
百弟子遲歸在朝夕暇時冬序半霜下木葉積明當課斬  
依結構西巖壁山田晚報熟芝尤及採楠獼猿長如人夜  
夜盜柿栗提防苟不豫六氣盡蟲賊公家事既已私事容  
棄擲方知用世士遺世等糠粃所過如虛空焉知去留迹  
我持一瓢酒欲以贈遠色歲暮不見君悵望空山中  
翻觀此守清祈禱蓋爲當時士大夫所甚重也

無爲子姓張氏諱悌字信甫居象山有別業在鄞城扁舟往來傲兀煙浪自視如鴟夷子皮然好結賓客殺觴左右具備捐所有予人無吝色父常以門戶微罪當逮詣吏無爲子奮請以身代父藉以免奉親能備孝養而身與妻子衣麤食糲象山中大瀛海間多陶隱居司馬練師遺跡無爲子早從方士習聞長生久視之說旣壯出遊南粵北燕回薄萬里愛武當山神明之奧欲隱其中歸語妻子妻子固不信一日大會親舊曰吾當去此隱矣乃引刀截髮解故衣被布衲偃履著行滕佩鉢囊掉臂出門徑去行至武當山止紫霄宮師事宮主張真人願執弟子役真人啟之道要署爲首衆晝則服勞薪水與衆同甘苦滋味取其至

薄者夜則危坐一榻脅不至席者三年忽晨起別衆而化

崑波府志

黃明佑字太霞潭州人早歲抗志煙霞歷諸名嶽禮武當

太和張真人嗣清微法派凡有所禱無不感應

武當山志

彭通微原名宏大號素雲河南汝陽人母夢一黃冠授大

桃食之而有姪大德十一年二月十五日生年十二事劉

月淵爲師至正四年游武當山時太和張真人主紫霄宮

素雲服勞執役三年得真人授煉氣棲神之旨訪終南走

蜀土青城入閩登武夷凡古仙過化處歷覽殆遍東浮浙

水陟天目至松江擇勝棲止明洪武十四年始至細林山

結茅居之初太和真人授記曰逢辰卽棲且曰雲間有福



地卽此山也山舊有泉久涸一日雷擊石罅遂成一井明  
太祖徧求天下高人有司以聞二十七年秋八月二十一  
日清旦啟關沐浴更衣跌坐語徒輩曰我將返我真又曰  
九天之上無不忠不孝神仙今人人倫未盡欲修僊佛蒸  
砂作飯豈不遠哉乃舉筆書偈曰九十韶光一度春由來  
幻法已非真玉音謾說追空想金紫羞將潤色身已見聖  
朝新態度休疑海外舊風塵於今解脫縈纏去萬仞峯頭  
月一輪書畢問左右曰何時曰正中遂倏然而逝是歲十  
月太祖命中使鄭誠恩入山宣召以羽化聞越月復遣中  
使入山啟窺視之正身不倚長爪遶身命有司糝以甄石  
繚以垣牆賜號明真子相傳其爪乘風化爲金蛇似蜥蜴

而無足長三四寸今辰山猶有之取置器中俄失所在

江松

府志○元王逢梧溪集云彭素雲中州人郭梅巖西江人  
並學全真有道行贈詩云彭郭上清班相望高世間木龕  
雙石壁櫻屨萬雲山軒冕泥塗底詩書極枯間鄉園  
數形夢欲借羽車還此彭素雲卽通微郭梅巖未詳

單道安均州人從南巖張真人學精究道法執弟子禮勤

懇弗怠真人昇舉之後潛藏於疊字峯屏絕人事虔奉玄

帝香火洪武初遊西華終南諸山仍居重陽萬壽宮一日

以所授玄秘付與門人而去弟子李素希攜冠履瘞於五

華仙塋

武當山志

李素希字幽巖號明始洛陽人元末棄家來遊武當洪武

初住持五龍宮後退隱於自然庵含光守默不與人接承

樂三年榔梅結實遣道士易本中上貢詔命道士萬道遠

齋勅賜以表裏鈔錠四年榔梅仍實復遣道士呂正中上進賜賚如前是年詣朝謝恩賜坐便殿諮以理國治身之道惟以道德奏對上說禮待甚厚賜還本山永樂十年敕遣大臣創建宮觀三十餘處經營之始訪古跡舊規皆一陳之常以手加額願皇圖萬歲天下太平永樂十九年六月初五日屬門徒各宜精修學道今教門大興吾去無憾矣語畢端坐瞑目壽九十三時戶部主事王和在焉翌日焚化骨齒皆青人皆傳其爲僊矣冠劍藏於黑虎湖上武當山志○國朝宋犛筠廊偶筆榔梅榔木梅實相傳真武折梅枝插榔樹而成道士每歲采而蜜煎充貢獻焉周自然金臺人自幼入全真教及長遊於四方以道化俗以藥濟人洪武初來往武當五龍行宮居民以其道明藥

效咸敬慕之年將耄耄貌若童穉一日以所藏道書醫術付與門弟子曰吾當委順去矣翌日沐浴更衣而逝葬於

桃源洞

武當山志

李德因號古巖金臺人自幼入陝西重陽萬壽宮出家道德南華三教經書得其要旨壯年遊武當於紫霄宮禮高士曾仁智爲師授以精微雷法明先天之理知體用之源徙居元和觀洪武二十三年湘王來謁武當嘉其有修煉之功賜往荊州府長春觀一日謂人曰吾將返矣作頌示之曰八十餘年光陰不染不著分毫大笑呵呵歸去一輪明月天高王聞之嗟悼不已贈曰爾本無生何期云沒拂袖三山金宮銀闕咲今日大地光明萬里秋天明月遣官

葬於元和觀之東

武當山志

酥醪洞主曰全真之教行於北方其始至南方者武當一派也惟當世祖平宋時遣使召龍虎山三十六代天師張宗演命主領江南道教終元之世江南掌教皆其後裔而張留孫吳全節復更迭爲大宗師故武當全真一派亦不得不修正一清微之法蓋其勢然也然觀張道貴至李德國諸人考其功行尚不失全真本旨而張守清弟子且遞傳於兩湖江浙間蓋自是而大江以南全真教幾徧及之矣

羅蓬頭者寓杭西北羊角埂上全真小庵非癡非狂冬夏惟一衲衣居菴一室中無坐卧具惟晝夜蹲地上穢汚殊甚而往往能前知一張其姓者故宋王表司宋亡依道館嘗舒手向羅問吉凶羅書狗災二字張問應在幾時書百日內張持齋誦道經日禱於神明冀免難一日見牝牡狗以茗帚擊之竟爲狗所傷而死聞人馬都錄者號靜齋以道法際遇度宗賈平章以海味進謝后啗之泄瀉不止馬進符水飲之而愈后召馬賜與之馬駭驚因謝恩自致其言曰臣上告佛佛言繼今他人進飲食不可造次供御言出口而賈顧已知之甫出禁門卽下臨安府獄面刺雙旗押付鄞都寨時以江上事危出師有日以故寨兵寬之得不死復於寨村落間禱雨有驗未幾宋亡崔中丞奉旨訪好人薦馬於世皇道法復有驗宣授浙西都道錄提點西

太乙宮恩賞殊優渥一日大雪訪羅於全真菴問未來休徵羅書賀字復書正字遞之但曰問知堂知堂者率意曲解既而明年正月宣州賀雷巖齋靈書宣命截替馬前職又鹽運司一卒張某問羅未來事時筆硯皆凍不可書卒怒捽蓬頭知堂勸止之烘筆硯爲書千二錢卒大笑以爲我此行勾四場鹽官所望數百緡而僅書若此已而卒出門道狹冰凍一蒼頭擔酒四缶來卒撞之酒墜地蒼頭者持卒哭曰我方千二錢買酒來須償我乃得去卒償鈔竟入門謝羅曰吾仙信有先見哉凡逐利市人問休咎其人將稱意必書其手曰鈔好仍乞鈔買酒肉啗已并衆人否則搖手終不爲一書後將死大笑拍手歌唱立地卒羅蓋

仙者惜其事遺落故所聞止此元鄭元祐遂昌雜錄

徐弘道號洞陽子元至元間修真瑞石山年八十三沐浴更衣書頌而蛻有不離本性卽神仙之句得法弟子丁野

鶴也弘道常感張平叔住山傳訣故菴名紫陽西湖志○

重修紫陽庵記云武林之脈盡於吳山吳山之最勝曰瑞石山紫陽庵又擅瑞石之勝者元至元間羽士徐洞陽菴之其徒丁野鶴棲真於此化日端坐如生漆蛻猶在鶴菴證蓋得北真之道者而紫陽則南真也南真修形神俱妙之術北真兼契虛無其歸雖同其入稍別豈有師南而徒北耶然不可考矣按洞陽不知何處人然亦當全真派元世祖平江南後北宗門人多漸染南宗不足怪也馮記以爲師南而徒北誤西湖志又云吳山有重陽菴大德間西川道士冉無爲雲遊至浙建洪武二十四年立爲全真叢林據此則元時全真派多居杭者

丁野鶴棄家爲全真道士居吳山之紫陽菴其妻王守素錢塘民家女一日召守素入山自付四句云嬾散六十三

妙用無人識逆順兩俱忘虛空鎮常寂坐抱一膝而逝方  
 外者流謂之騎鶴化守素遂亦束髮簪冠著道士服奉夫  
 遺屍二十年迹不下山年逾七十幾於得道者丁卯進士  
 薩都刺天錫贈之詩曰不見遼東丁令威舊遊城郭昔人  
 非鏡中春去青鸞老華表山空白鶴歸石竹淚乾斑雨在  
 玉簫聲斷綵雲飛洞門花落無人迹獨坐蒼苔補道衣耕  
錄○西湖志云丁野鶴錢塘人棄家為全真道士師徐洞  
陽沿門誦經受少許米不他丐元霄眾以月供齋競談吳  
門燈之盛令各開目目啟而燈見久之眾歸往謝之日更  
能化羣鶴眾爭起捕所化鶴皆紙也鶴鳴人喧忽反顧丁  
作控鶴坐而化漆身祀焉又云王守素入山修道途中拾  
得樹一株持歸植於山中祝曰我若功成願汝成林後二  
十年樹已成林守素即化去相傳  
葬於玄天殿之臺前樹名成道樹  
 元延祐間有姚真人者錢塘人家温飽其妻蔡氏一日語

其夫云欲脫俗修真以家業二分畀夫娶妾為成家之計  
 自以其一建庵為修養之需夫曰汝既修真吾無子女何  
 忍獨墜俗緣耶蔡氏然之乃曰修真不宜夫婦同處各建  
 一庵於西城下夫庵在妙心寺北曰長生妻庵在洪福橋  
 西曰長春夫妻皆證道妙時謂之雙修云蔡號冲靜明田  
西湖遊覽志○志稱姚真人夫婦名庵曰長生  
長春與再無為以重陽名庵同亦全真道派也  
 天台道士項子虛氣正色剛耐習勞苦視財帛如糞土師  
 全真之說養心若保赤子通岐黃書其治病不擇貧富輒  
 徒步以往治所居室名之以曰生元袁稱清容居  
士集曰生堂記  
 趙與慶字虛中宋世有大梁宗卿某佐縣黃巖樂而家焉  
 與慶其四世孫也遯世樂道從北方全真之學志彊氣堅

習不至席踰十年矣遂築室委羽山西北名曰野月謂月猶身也則而象之蓋以順其天年入於自然云元袁稱野月觀記  
黃公望字子久本姓陸世居平江之常熟繼永嘉黃氏遂徙富春父年九十始得之曰黃公望子久矣因以名字焉性稟敏異應神童科至元中浙西廉訪徐琰辟爲書吏一日著道士服持文書白事琰怪而詰之卽引去更名堅白號大癡道人隱於西湖之笕箕泉已而歸富春卒年八十六楊鐵厓謂子久詩宗晚唐畫獨追關仝其據梧隱几若忘身世蓋游方之外非世俗所能知也所著曰大癡道人集別有紙舟先生全真直指一卷抱一含三秘訣一卷并金月巖編公望傳元詩選參國朝錢大昕元史藝文志補○道藏目錄有紙舟先生金丹直指

與親傳直指同卷云嗣全真正宗金月巖編嗣全真大癡黃公望傳此當卽全真直指一卷金月巖未詳蓋公望之師輟耕錄載張句曲戲題黃大癡小像云全真家數禪和口鼓貧子骨頭吏員臙此雖戲言然亦足證公望爲全真道士國朝周亮工書影云李君實曰嘗聞人說黃子久年九十餘碧瞳丹頰一日于武林虎跑同數客立石上忽四山雲霧擁溢鬱勃片時竟不見子久以爲仙去又國朝錢曾有學集註云大癡晚年遊華山憩車箱谷吹仙人所遺鐵笛白雲滃起足下擁之而去二說不同然皆以爲公望得仙也

酥醪洞主曰元世祖至元十三年始平宋其先全真教何巨川隨郝經使宋不能至杭也然觀羅蓬頭及黃公望諸人則宋平後浙人多學全真者矣特稍參以南宗耳

余岫雲名希聖號非非子華蓋山南谷人年十五辭親學全真道於宜黃縣南華山昭福觀旣而歎曰託兄弟以養

親從師以入道果爲何事耶辭其師去徧歷江漢淮海渡  
河循山東游齊魯至燕趙間兩游淮陰入終南登太白而  
後還乎武當衡岳羅浮出武夷過天台寓温州同學者之  
舍州郡命方士禱旱不應或曰此君不凡當可得雨羣起  
之岫雲曰欲雨乎是日雨霑足郡有教人學道者謂出妻  
子破家產乃可岫雲曰非道也復爾家室治爾田疇行人  
道之常不累於心可也及歸臨川祥符道士黃執中率玉  
清觀之人處之崇仁仙遊山破屋數椽耳岫雲日使童子  
挈一簞入市人見爲岫雲童也輒與飯一小器日向中簞  
稍滿卽還師弟子烹水瀹而食而江東西高雅之流詣其  
室者分簞食共食無愧容無德色亡何信嚮四至仙殿門

廡不約而輯翰林學士吳公之夫人岫雲從姑也公嘗問  
爾之爲學何如以顏子喟然章對始則恍惚難象而卒見  
卓然自立時至而自化爾後至元五年己卯十月化去年  
六十未沒時徧與所識書別略無怛意弟子彭致中瘞諸  
山下致中山下人嘗遊方江南道教之師署爲仙遊昭清  
觀住持提舉云元虞集非非子幽室志○志又云書樓大  
有汝州趙先生嘗奉詔至京師而得見之服羊皮大布之  
衣曾不掩脛而肌膚潔白如玉食飲甚寡而氣充然如春  
與人語辭簡而意遠貴富盛氣多智術者見之莫不泊然  
自失予歸田江上聞有蓬頭金先生者甚高潔接其徒極  
嚴峻間嘗往來武夷聖井諸山而不獲相見趙金二人亦  
全真教之有道行者其名字未詳文內稱翰林學士吳公  
係吳澄元史澄字幼清撫州崇仁人初居咸口里當華蓋  
臨川二山英宗卽位遷翰林學士岫雲與澄居里同故澄  
夫人爲  
其從姑

李道純字元素號清菴別號瑩蟾子都梁人博學長才所著中和集盡闢一切爐鼎服食修煉之說歸於沖虛渾化與造物爲一併註太上大道德經三章道德會元等書行世鳳陽府志參四庫提要○中和集內有全真活法一篇篇則道純全真派也杜道堅中和集序云維揚損菴蔡君志頤清菴門人也得其贖馥編次成書大德丙午謁余印可丙午成宗大德十年道純於時當已化蓋世祖時人道藏目錄載道純所著有太上昇元消災護命妙經註太上玄通經註無上赤文洞古經註太上老君說常清靜經註三元易隨一卷全真集玄秘要一卷瑩蟾子語錄六卷都梁漢零陵郡晉以後爲邵陵郡今湖南寶慶府武岡州地道純蓋湖南人而居鳳陽者

酥醪洞主曰中和集全真活法一篇道純以授諸門人者其云全真道人當行全真之道所謂全真者全其本真也全精全氣全神方謂之全真才有欠缺便不全也

才有點污便不真也全精可以保身欲全其精先要身安定安定則無欲故精全也全氣可以養心欲全其氣先要心清淨清淨則無念故氣全也全神可以返虛欲全其神先要意誠意誠則身心合而返虛也是故精氣神爲三元藥物身心意爲三元至要學神仙法不必多爲但煉精氣神三寶爲丹頭三寶會於中宮金丹成矣豈不易知豈爲難行難知者爲邪妄眩惑爾觀其所言頗得全真派養生之要蓋欲挽南宗流弊而歸諸北宗者明王世貞弇州續稿有書中和集後云余始得此書而讀之覺其緊爽有味其於一切內外丹藥吐納伸經之術如黃庭參同悟真之類皆指以爲傍門小道



而究其大指多出禪門如四祖啟法融南嶽醒大寂語  
 又雜以中庸飾之大要欲成一家言耳非必有所得也  
 吾所聞如尹蓬頭赤度子所見如閻蓬頭劉大瓢輩遠  
 者至數百歲邇者亦自強力飲噉兼人傍門小道行之  
 久久亦自有益第不能出世耳此曹子眉山公所謂啖  
 豬肉者也李先生所謂談龍肉美者也按王氏既知傍  
 門小道不能出世乃不究全真要道而但嘲李先生為  
 談龍肉美何耶

杜處逸字道堅號南谷子采石人年十四得異書師事葛  
 蒙庵入茅山昇元觀作道士皇慶間授隆道冲真崇正真  
 人創元通觀作覽古樓聚書萬卷延祐中住武林宗揚宮

築老君臺肖明像旁列尹喜列禦寇莊周等為十賢趙孟  
 頤記其事後微疾爆然有聲而逝太平府志○杜道堅中  
 頤以李清庵中和集謁余印可余未敢映先已知羣妄掃  
 空一真呈露謂如天付之而為命人受之而為性至於先  
 天太極自然金丹光照太虛不假修煉者漏泄無餘矣可  
 以窮神知變而深根益極可以脫胎神化而復歸無極也  
 抑以見道之有物混成儒之中和育物釋之指心見性此  
 皆同工異曲咸自太極中來是故老聖常善救人佛不輕  
 於汝等周公豈欺我哉覽是集者切忌生疑觀所論蓋深  
 得全真之學者石墨鑄華云陝西樓觀有元時希聲堂碑  
 文始先生碑杜道堅書文始先生尹喜也道堅江南人而  
 為陝西樓觀書碑則亦全真派也道藏目錄載有道堅所  
 著道德玄經原旨四卷經真玄旨發揮二卷通玄真經  
 續義十二卷四庫提要有宋杜道堅文子續義十二卷  
 與通玄真經續義當  
 卽一書云宋人者誤

酥醪洞主曰宋時大江南北道教亦盛大約皆南宗也  
 然王逢梧溪集有十二月廿二日為王重陽真人誕辰

是日立春在松江長春道院瞻拜真人及七真像敬題  
薛一山丹房詩則元時全真教已行於江南矣余希聖  
李道純杜道堅蓋其著者考其所學則以北宗爲主旨  
而不雜以南宗亦篤信之士也

張三丰遼東懿州人名全一一名君寶三丰其號也以其  
不飭邊幅又號張邈邈頤而偉龜形鶴背大耳圓目鬚髯  
如戟寒暑惟一袖一簑所啖升斗輒盡或數日一食或數  
月不食書經目不忘或處窮山或遊市井能一日千里嬉  
笑諧謔旁若無人嘗遊武當諸巖壑語人曰此山異日必  
大興時五龍南巖紫霄俱毀於兵火三丰去荆榛辟瓦礫  
與其徒創草廬居之已而舍去行遊四方太祖故聞其名

洪武二十四年遣使徧覓之不遇後居寶鷄之金臺觀一  
日自三言當辭世留頌而逝縣人共棺殮之及葬聞棺內有  
聲啟視則復活乃遊四川見蜀獻王復入武當歷襄漢不  
常厥處永樂中成祖遣給事中胡濙內侍朱祥齋璽書香  
幣往訪積數年窮陬僻壤皆到迄不遇乃命工部侍郎郭  
璉隆平侯張信等督丁夫三十餘萬人大營武當宮觀費  
以數百萬計旣成賜名太嶽太和山設官鑄印以守竟符  
三丰言或言三丰金時人元初與劉秉忠同師後學道於  
鹿邑之太清宮與里人張毅相習毅四世孫朝用嘗遊寶  
鷄遇三丰問汝家名毅者爲誰答曰吾高祖也三丰曰吾  
曾見其始生時今孺子亦漸長努力讀書官可至三品後

亦符其言天順三年英宗賜誥贈爲通微顯化真人然竟

莫測其存亡也國朝王鴻緒明史稿○考名山藏紀三

忍三丰子嘗與劉太保秉忠冷協律謙學於沙門海雲經

籍墳典過目成誦成祖靖難時真武立帝屢示靈助上感

神寐於武當大立宮觀三丰一日至京師成祖召問之曰

吾欲學道誰最樂者對曰食美嗜遺通利極樂事上謂其

不敬欲殺之忽有所苦則不能食與不得遺方思之道逢

使者附進簞衣草數莖煎服尋愈上殊念之以給事中胡

濙往求之又命王宗道奉書若香遍入名山求十年不得

至天順未或隱或見英宗聞之封爲通微顯化真人此皆

明史稿未及者名山藏又云三丰至武當命弟子邱玄清

盧秋雲居五龍南巖又云秋雲悟全真之理又云成祖遣

王宗道往求給全真牒而野獲編稱邱玄清爲全真道人

然則三丰全真派也他書紀三丰神異甚多茲不具錄

酥醪洞主曰明初道術最著者三人一周顛一張中一

張三丰皆能前知者周顛太祖親爲撰傳張中宋濂以

所聞於太祖爲之撰傳然皆不詳何派張三丰事見於

說部及志乘者並謂其居武當則全真派也武當自張

道貴張守清後多兼習清微上道惟三丰無之名山藏

稱其有問養生術竟日不答論三教等書若決江河所

言皆道德仁義忠孝之旨此全真正學重陽長春之的

裔也當時成祖徧求之故世多附會之詞而明陸深玉

堂漫筆乃謂成祖此舉別有所爲胡忠安濙行事蓋奉

密敕則以爲建文遜荒欲求得之然非三丰有異蹟成

祖亦不能假託也吁亦神矣哉

全真道人邱玄清富平人初從黃得禎出家洪武初來遊

武當禮張三丰真仙三丰曰山當大顯無幾何時矣因結

三菴命弟子分居之曰五龍菴命玄清居之曰南巖菴命

盧秋雲居之曰紫霄菴命劉古泉楊善澄居之而自結菴以奉立帝後有司以立清賢薦於朝授監察御史轉太常卿每遇大祀天地上宿齋宮諮以雨暘事奏對有驗上深敬焉公餘黃庭道德不輟於口上嘗賜以媛女固辭不受益重之及成祖靖難立帝屢示靈助遂大立宮觀於武當名其山曰太和所建地即立清輩菴居而三丰所結菴成祖大之曰玉虛宮前言遂驗立清後隨成祖北遷一夕謂門徒曰明日乃吾歸辰至期端坐而逝明沈德符野獲編何喬遠名山藏參襄陽府志陝西通志○野獲編稱太祖以二宮人賜之邱度不能辭遂自宮今觀其遺像儼然嫗也陝西通志稱其賜媛固辭當卽一事

盧秋雲光化人初從終南重陽萬壽宮高士遊悟全真之

理後師張三丰為弟子隱南巖之巔永樂八年無疾而化名山藏參武當山志○志又云劉古泉河南人有躡景凌虛之志入寶珠巖下常蒲團獨坐一旦告其友楊善澄曰吾今解帶正在此時語畢而逝又云楊善澄太行山西人夙有道契與劉古泉為友人並敬之楊劉二人志不言何派然與邱立清盧秋雲同為三丰弟子亦全真教也

蒲善淵關西人從邱立清學莊列之道洪武十五年除均

州道正永樂間奉使四方諮訪賢達後於章貢元妙觀無

疾而化葬於黑虎澗之上

武當山志

鄧羽南海人明初青陽令後為道士隱武當之南巖永樂

中不知所往人以為仙去有觀物吟一卷

國朝錢謙益列朝詩集○武

當山志云鄧青陽南巖道士生於元季資穎過人不屑與儕俗伍早來武當從高士學黃老莊列龍虎大丹諸書深得其奧凡所寓興吐詞發語皆有激發遊武林有忘情消白日高卧看青山之句所著觀物吟又曰警世文洪武初

吳中多有識之者按卽此鄧羽亦全真派道士也

王宗道字景雲一字景僊淮安人與雲水道士何無垢者居數年遊嵩華一日獨坐菴前忽一道士負笠露裋麻衣策杖自東南來長揖就坐景雲與語略露半指曰得非三丰先生乎道士曰子非景雲乎驚且喜拜執弟子禮道士曰無以爲也旣授以導引嚙漱秘術教以步虛洞微之辭遊戲市肆士大夫多延致之題詩飲酒竟日不辭因言山行欲得獐皮製裙汝爲我募景雲歸具飯飯道士遂失所在尋至海上西經徐汴雒陽嵩華終南太白諸山將往游青城復相遇於漢武臨軒之所因諭之曰汝子在泮待其成名相會未晚言訖授笠杖而別洪武壬申年也永樂改

元景雲子亨任給事中越三年成祖思見三丰國子助教

王達善言景雲亦與往來成祖召見給全真牒賜金冠鶴

擎使奉書若香徧入名山求之十年不得

名山藏方外記

酥醪洞主曰自張三丰至王宗道諸人亦武當全真派

然其所學不兼正一蓋親炙三丰傳授者正也

趙元陽名宜真其父仕元爲安福令因家焉幼穎敏習進士業例試入京以病不能赴夢神人曰汝神仙中人何望世貴遂從塵外遊師李元張天全結茅匡山居之於正一天心雷輿全真還丹之旨多所發揮洪武壬戌正月朔謝衆曰自今閉關以還吾真慎無干焉五月三日夏至啟關漱浴更衣跌坐呼弟子於前書偈畢雷電交飛風雨晦冥

乃翛然逝明日縣官士庶觀者雲集殮時肢體屈伸顏色

如生著有詩詞歌論若干篇其徒甚眾續承道統者劉淵

然一人而已豫章書○道藏目錄載有靈寶歸空訣一卷

云崇文廣道純德法師教門高士原陽子趙

浚儀趙宜真撰蓋宜真河南人明初封法師者江西通志

云宜真洪武初寓雩都紫陽觀壬戌沐浴更衣書榻上云

遁世和光了幻緣緣消幻滅獨超然清風徧界無遮障赫

日當空照大千書罷倏然而逝景泰

六年贈崇文廣道純德原陽趙真人

酥醪洞主曰王世貞游白雲觀記云全真之教徧天下

蓋與元相終始明興而其道始小屈以劉淵然之見崇

不能盡復其盛也淵然為宜真弟子然則宜真淵然全

真派也元時江右全真派自張樸趙友欽後至陳致虛

而大行其學皆兼南宗豫章書謂宜真通全真還丹之

旨則亦出於張趙宜真又通正一天心雷奧正一之學

源於江右且元時張宗演後裔世為掌教宜真故兼習

之也然自是而北宗南宗及正一教遂多通而為一矣

劉淵然贛縣人幼出家為祥符宮道士後詣雩都紫陽觀

師趙原陽傳其法能呼召風雷洪武二十六年太祖聞其

名召之既至入對便殿賜號高道館朝天宮永樂中從駕

至北京仁宗嗣位賜號沖虛至道元妙無為光範衍教莊

靜普濟長春真人給二品印誥與正一真人等宣德初進

號大真人七年乞骸骨命送南京朝天宮御製山水圖歌

賜之卒年八十二閏七日入殮端坐若生淵然有道術為

人清靜自守不干世事故為累朝所禮正一真人張宇初

之術淵然所授也

國朝王鴻緒明史稿○明史稿又云張正常德陵四十二代孫洪武元年授

正一嗣教真人十年卒子宇初嗣宇初道法受之淵然後與淵然不協相詆訐人輕之據此是正常於正一法已失其傳淵然本其師授以全真兼正一故宇初轉學之也明徐有貞重建蘇城福濟觀記云郭宗衡產崑崙師長春真人劉淵然居兩京侍祠行宮久之乃領是觀作二翼宇一祠純陽及南五祖北七真一祠長春諸師據此則淵然仍守全真之學正一之術係所兼習非以是為宗主者徐州志云淵然號體立子祖母謝氏夢紫衣道者入室而生宣德七年八月八日屬其徒日氣聚而生氣散而死生邵以正雲南人早得法於劉淵然淵然請老薦之召為道

錄司左元義正統中遷左正一領京師道教事景泰時賜

號悟元養素凝神沖默闡微振法通妙真人英宗復辟以

正具疏辭詔以左正一間住未幾真人張元吉薦其戒行

詔復真人仍掌道教先是百官賜宴正一真人列二品班

之末天順三年將行慶成宴禮官請正坐次帝曰殿上宴

文武官真人安得與其送筵席與之以正廉靜謙謹禮度

雍容措紳咸重之六年八月卒遣官致祭又有沈道益者

亦有道術仁宗初命為混元純一沖虛湛寂清靜無為承

宣布澤助國祐民廣大至道高士階正三品賜以法服時

天子頗信異教褒崇道流然淵然輩淡泊自甘不失戒行

迨成化正德嘉靖朝邪妄雜進恩寵濫加所由與先朝異

矣明史稿○嘉興府志沈道益號野雲初居鬱秀院躡蹻

不檢或醉卧穢地或破衲不掩體頸有爛瘡人號為沈

爛頭其師厭之逐去復來杖之亦不怨一日忽大叫自謂

得道時大早爛頭日我來便有兩人怪之令登壇果大雨

由是號道人永樂初遜國諸臣株連詔獄者數萬道人在

都下稱設牢詣諸王府化餽頭有施一萬者徐納袖中未

嘗滿使人覘其所為則出御街即懸睡道側兩袖無所有

錦衣獄吏報有道人不知從何入分餉餽頭訖去矣守者

道七  
慮有變繫之獄因其自言牒嘉興問所從則沈道人固在  
忽不見乃攝觀主至而獄中所繫依然爛頭道人於是都  
人競往謁詢禍福皆中成祖北狩仁宗監國問事多奇驗  
一日忽大笑則成祖師勝賜從臣飲之時也忽大哭則榆  
林川晏駕時也靈異不可殫述仁宗常御製道人傳登極  
封至道高士禮送還山按史及志並未言道益所師何人  
以志所載道益功行核  
之亦當全真法嗣也

酥醪洞主曰明之道流雜進恩寵濫加莫甚於嘉靖之  
世而其最幸者曰邵元節曰陶仲文史稱元節貴溪人  
龍虎山上清宮道士師事范文泰李伯芳黃太初咸盡  
其術嘉靖三年徵入京雨雪愆期禱有驗封爲清微妙  
濟守靜修真凝元衍範志默秉誠致一真人其徒陳善  
道亦封清微闡教崇真衛道高士范文泰等所學不可  
考然元節出家於龍虎山其封號與善道俱冠以清微

二字清微道宗以天師爲法錄傳教之祖則正一派也  
又史稱仲文初名典真黃岡人嘗受符水訣於羅田萬  
玉山嘉靖中由黃梅縣吏爲遼東庫大使秩滿需次京  
師寓元節邸舍元節年老因薦仲文於帝仲文所事玉  
山名山藏有傳云玉山深味丹經旁通風角堪輿奇門  
符水而尤善於醫繪竹蘭清逸有韻其他譜琴擊劍蹴  
踘躡躡雜伎種種入能品語人禍福多奇中陶仲文嘗  
學於玉山玉山謂之曰不第養生可致富貴其後仲文  
貴世宗贈玉山清微神霄演法真人據此則玉山實方  
伎家觀告仲文語餌之富貴蓋非有道者其贈號冠以  
清微則亦正一派也元節仲文並被尊寵而仲文熒惑



世宗大似林靈素其術比元節為卑蓋仲文本小吏非學道之士不足怪也當時因仲文得幸者若段朝用龔可佩藍道行胡大順藍田玉羅萬順王金等或以燒煉或以服食或以符籙其術固謬其人或並非道流故史並列之佞倖傳中然如劉淵然輩史別為之傳且特稱其淡泊自甘不失戒行夫劉淵然邵以正亦何嘗不兼通正一之學要其所宗主者全真也後之學道者其亦守全真之教而無若邵元節陶仲文等競取世資則庶幾矣

吳守一蘭陵人早為黃冠師後從淵然劉真人授以鍊度秘術入琅邪神峯山之陽棲霞辟穀有年忽有道士入菴

與語須臾袖中出茶一包遂烹與共啜出戶少頃道士不見年逾九十鶴髮童顏羽化之夕奇香滿室白鶴繞空者

移日山東通志

守法真人字浩然嘉定人父名海太常丞守法生有骨相始學易為儒生常因病適一黃冠至識之遂勸之入道且曰從吾言疾即愈後當大振立門從之疾果平已而從應元孫真人學又學於通妙邵真人盡得其術尋以龍虎山張真人薦住持東嶽廟未幾奉詔偕天下高道校道藏經因禮部尚書胡澗薦擢神樂觀提點天順丁丑擢道錄司左演法兼朝天宮住持癸巳遷左正一明年封立志守靜清虛高士尋封冲虛靜默悟法從道凝誠衍範顯教真人

賜誥命銀印并封贈其父母弘治改元授左正一命掌道錄事踰三年卒守法性質直謹厚尤以謙約自守頗精於術而尤本之以誠意以故用之有驗成化間大旱命禱雨雨隨至明秩又旱禱亦應又明年旱禱不應守法篆符於鐵授中貴往投西湖之龍潭頃之西南雲起如鳥駐潭上俄見青蛇長數尺盤旋久之中貴未入城雷雨大至上益喜賜第居之一日召入便殿詢以天人感應之理對曰惟德動天至誠感神此外無他道也上深然之聞者服其正

對續文獻通考

酥醪洞主曰自趙宜真至守法真人遞相傳授皆全真派也然兼習南宗及正一之學余考之釋氏神秀爲北

宗慧能爲南宗或問南北宗何自出於玄挺禪師玄挺曰心宗無南北宜真諸人通諸派爲一豈此意耶然自是而後宗派混淆稽之載籍鮮有明揭其爲全真者間有揭者彙錄之不能詳也蓋至是而全真之學微矣

楊汝真揚州人自幼刻苦修全真之道後遇異人授以奧理入蜀彭縣來往苟僊楊平二觀蜀藩聞其道嘗敬禮之壽一百二十一歲於丹景山尸解

名山藏方外記

道士黃一真號雲峯又號誠一子內鄉夏館保人母王氏夢北斗樞星繞身而娠洪武壬申一真生時有紅光少厭世紛入邑中奉僊觀爲道士往來鎮平五朶山師全真李崇樸藏修三十餘年人莫窺其秘也南陽宗藩唐王常命

為道官主南陽北觀不樂居去常往來玉清宮大谷峪玉  
 僊宮而居奉僊觀為多一日謂其徒曰打破鴻濛竅已見  
 未生前明年臘月內信步上壺天至期若有音樂導從者  
 集眾與訣端坐而逝時成化壬辰十二月也壽八十一真  
 人既逝次日有見其謁唐王者又三日有見在盧氏縣募  
 化核桃分送歸奉僊觀修黃籙會手押宛然弟子啟其壙  
 面如生壙輒誤墮額血出咸謂得道云南陽府志  
 歟子李正德間太和山得道者以其辟穀但噉麥歟故名  
 荆藩永定王慕之遣十校移文叅藩董是山者禮聘以至  
 寓蘄武當宮衣破衲不食王屢迎入宮祈長生訣皆不對  
 但云儒者修身齊家此長生訣也賜金帛甚厚皆委棄不

顧已辭歸王仍遣十校送之令索書報命至漢口卧舟中  
 忽不見校奔至山見李坐捨身巖險絕處誦經遙為拜泣  
 索書又不見後復遣校至山則云李尸解矣校於歸途又  
 見李持鉢行如飛亡何王以干宗正條幾覆國始悟李語  
 非漫然也續文獻通考○武當山志云歟子李屠大山中  
 武當係全真派也  
 全真王道成河南人成化間遊平涼居崆峒山問道宮靜  
 修四十年又知黃白術百歲以上人貌若五六十者能啗  
 巨豚肩粟至數升飲酒不醉行步如飛鄉人悉宗之弘治  
 年建修三清殿正德七年又起玉皇閣總制張公以師事  
 之號為王全真正德九年羣執役者見出貴侈厥宮院乘

夜暗劫全真先知之命賈徐二弟子匿林中二生強師避之師曰吾有宿命未還汝急往移時賊果至挾財將出全真斥其名言之賊懼敗露持斧破其首血皆白膏是夜全真夢訴于張軍門遣兵尋捕之踰年始獲真盜是旦途行人亦有見其像者與夙昔無異後嘉靖十四年江西朱仲山商于川中邁疾得道士療之而愈與以金帛不受乃謂曰吾崆峒道士王全真增修老君閣中有綉像未完爾可敷金商至宮始知王全真逝乃爲建閣並裝貼塑像人始信全真脫化而去益崇其祀典云

崆峒志

鍾了髻百十四歲尙了髻故名丁未冬上親賜見命居白

雲觀明王世貞鳳洲筆記○弁州續稿有游白雲觀記云鍾了髻短而鬢髮強半白問其年日不記也固叩之

則曰吾生十三歲而有土木難依稀從長老說之也則百十四者信矣問何以壽則曰天可憐活爾許年吾無術惟不娶不多飲不怒不識數耳余心服其語簡切匪妄以此核之土木之變在正統己巳年十三則生於正統二年丁巳至嘉靖二十六年丁未計百一十一歲云百十四者世貞記時蓋在嘉靖二十九年也

孫玄清號海嶽山人青州府壽光縣人自幼在嶗山明霞洞出家禮李顯陀爲師後遊鐵茶山雲光洞遇通源子授以昇降天門運籌之法年十九歲卽墨縣太和真人攜住黃石宮玄清苦煉二十餘年復遇斗篷張真人共談修真口訣遂豁然貫通嘉靖二十七年至京白雲觀坐鉢堂一載大著靈異值京中天旱求雨有效賜護國天師左讚教主紫陽真人隆慶二年六月上昇壽七十二玄清本龍門派四代孫後別立法派名金山派因在嶗山修真亦名嶗

山派

國朝梁教  
無立門必讀

李赤肚者徽之黟人或稱徹度少負奇特遊酒人聲伎之間揮金無所惜年四十挾王鳳仙客鳩茲病羸頓死一日有丐者呼門外鳳仙召之入丐者以手摩赤肚頂曰從吾言可治不則死赤肚伏枕首肯丐者索鳧蛋五十枚酒一甕以右手援赤肚攙膝上左手且剝且吸初攬時赤肚肢骨嗶然有聲徐徐抱之凡坐七晝夜而所苦霍然赤肚跪請其姓名曰吾乃邱長春十代孫清淨遨蓬頭也遂掃室焚香稽首稱師卒爲弟子悉教以還丹修煉之術而更名一了居三年與遊天目山忽語赤肚曰善守而道黃白男女皆旁門惑世罪業滔天汝其戒之言訖而去赤肚尋別

築石南菴於萬年縣居鳳仙爲道姑而雲遊海內初入全州湘山更入太和山散髮長嘯遇閻道人見如夙識閻道人卽弇州所記閻蓬頭者之茅山屏居一室忽出投清涼澗中見者驚救赤肚方泛泛若鳧捧腹大笑遂不著衣嚴寒大雪尤見眉頰間汗簌簌下已入終南山與銅帽道人爲侶銅帽者年亦數百不知何許人以戴銅帽故名又十年出遊廬山住三年再入茅山訪閻閻已先一年尸解茅山故多遊衲赤肚更著衣履混諸衲中少試功行始相顧而嘻已少試治病病立愈相顧而驚稍稍有和尚奉爲師者自是名熾遠近問病者絡繹千里王公巨卿爭致饋供赤肚皆謝去治病不假藥餌視色行法如其師法以七日

爲期重者再七日又重者用符呪僵者立起或叩以仙術  
輒閉目搖手曰不知不知每坐定輒叩齒塞兌含液漱漉  
澆而咽之以後摩面梳髮一日能九食亦能九日一食飲  
一升醉或數十升不醉葷蔬俱適口不擇太原王公荆石  
云師得度世術今春秋八十九矣貌若四十許人眉宇嘗  
有氣出如雲煙師適出二像屬題彷彿若張果邢和璞忽  
老忽少變幻不常贈以詩云三度逢君鬢未星從知大藥  
九還成煙霄路迴翔黃鵠參井捫來下赤城彩筆行吟高  
意氣青囊市隱足治生相期五嶽朝真去爲問何人向子  
平黔縣志。按遨蓬頭名清淨李赤  
肚名一了此用龍門派字爲名  
閻道人名希言號亦曰希言不知何許人自言家山西有

妻室生一女年二十七七八時成瘵幾死遇師誨以坐功得  
無恙嘉靖乙未丙申間去家學道後從太和山至勾曲之  
乾元觀時似六十許人或曰已百餘歲或曰元時嘗爲某  
路總管希言皆漫應之終不測其何如人也頂一髻不巾  
櫛人因稱爲閻蓬頭身著粗布夾衫有裙襦而無相服履  
而不襪爲人疎眉目豐輔重頰腰腹十圍叩之如鐵彭彭  
然盛暑裸暴日中不汗窮冬鑿冰而浴又令人積溺盆中  
浴之出使自乾嗅之殊不覺膻臊喜飲酒食能兼人第嗜  
蔬而安粥或叩以延年冲舉之術不應惟勸人行陰隲廣  
施與勿淫勿殺勿憂勿患勿多思而已乾元觀故址初僅  
有門及丙舍道人遊金陵公卿間彙貲成諸殿閣山徑左

右皆植桃李春時若錦繡益斥南畔田引山泉溉之成稻田數十畝住觀五十餘年一日過毛百戶俊家飯畢索湯浴三浴後移茵蓐地上坐似欲解去狀其徒問所欲言曰我何言窮理盡性以至於命齊家治國平天下而已遂瞑跌坐不僵淡旬猶有煖氣色休休然汗沾鬢若璣三日入龕七日移至乾元觀百日視之猶若生時萬曆戊子十月也明王世貞弇州山人續稿閩道人傳○聞希言不詳何派然其與李赤肚如夙識亦當全真道士也江甯府志云希言嘗曰心無不存謂之照欲無不混謂之忘又曰喜中知止則不喜怒中回思則不怒能咬此二語使人忘境玩其言蓋深有得於全真之學者

曹薰名家子少不識字好放鷹鼓刀破產結客遭家難愈益無賴及壯之曠野遇異人納一丸口中醉七日諸少年

邀薰遊忽忽無意往人咸怪之後春月隨衆禮茅君於茅山至乾元觀松鶴寂歷但聞泉聲愀然改容曰此吾故宅也不復還家結茅巖巖下瞑目跌坐百日時閻蓬頭李徹度皆來指示道書薰一日便記識不忘執筆作書形如鸞鳳殊有翔翥之勢有以往事問者恍隔世矣然聞朝野不平事則鬚眉奮掀議論風起一日有玉立丈夫從旁叱曰狂奴尙復爾耶已忽不見迺遂自悔責掩關寂坐後頂門關開訇然有聲現蜃橋於腦中薰自知幻妄復鎮以混沌號混成子所著有道德陰符悟真叅同諸經并警歌百首皆談內丹晚年歸掃邱墓指塘左土曰可瘞吾骨向者結胎茅山今者遺蛻爾祖之旁出世住世兩無負矣年九十

有三端坐瞑目而逝子弟哭其尸張目叱之者三薰長髯人因多稱為髯仙蓋與八絃道人同時云

鎮江府志

白玄福號柱峯係西秦金明延川人氏世居閩閩稽譜係白樂天二十八代孫年不惑以明經擢職官未幾掛官不仕逕入太和七真洞後為諸當事強起巖穴修復武當宮庵橋梁嗣修明真庵為聚徒講肄之所囑徒云慢理蒲團修太嶽願成志士闡全真壽七十一日書偈云性返靈明炁返空太虛似我不相同只因會得些兒意撒手撐開混沌中偈畢端坐而逝

武當山志

楊常炫山西人庚辰進士明末棄官登華山頂禮皇老大神修真悟性復遷嵩嶽養氣中方以門生故吏往來雜遝

乃三遷於武當之北巖與住山白玄福相友善餌精服朮

於洞者六年嗣是豫知山中劫數將至出游江漢間為副

憲余公誦經救劫刊劉洞陽總真集行世

武當山志

鄧起西名大臨號丹邱常熟人鄧徽曾孫徽舉於鄉以母

老不上春官及母歿服闋徽仍不上日吾向以母在不上

今往是利母之歿也時稱為真孝廉起西幼孤稍長即能

力學從遊於江陰黃介子餘祺歲乙酉江陰城守不下介

子與其門人起兵竹塘應之起西募兵於崇明事敗介子

亡命淮南以官印印所往來書為人告變捕入金陵獄起

西職納橐餽獄急介子以其所著小遊仙詩園中草授起

西坐脫而去當事戮其尸起西號泣守喪鋒刃之中贖其



首聯之於頸棺殮送歸有漢楊匡之風當時稱介子之門  
有徐趨鄧大臨趨則抗節而死者也起西師死之後遍走  
江湖欲得奇才劍客而友之卒無所遇辛丑訪黃梨洲於  
雙瀑院曰吾已竄身為黃冠矣唱和旬日偕至武林起西  
上玉皇山去甲辰梨洲至虞山起西以其精舍館之歎對  
數人張雪崖顧石賓皆其道侶也隨訪熊魚山於烏目訪  
李膚公於赤岸皆起西導之比梨洲返棹起西送至城西  
楊忠烈祠下涕零如雨未幾遂逝梨洲謂起西之在玄門  
苦身持力無異於全真之教有死之心無生之氣以保此  
悲天憫人之故我無愧師門卽鄧牧張雨亦不願爲是谷  
音中人物然而世眼易欺禪師語錄流通頗不寂寞世無

杜清碧起西名氏已自銷沈云

國朝黃宗羲南雷文定後集鄧起西墓誌銘○按

鄧起西當全真道士梨洲謂無異全真者道派至明季世  
多不能辨故約略言之耳又全祖望鮑琦亭集外編有陳  
仙傳亦明亡爲道士者云陳先生王賓字天倪定海人諸  
生甲申之變號眺於野及餘氛在翁洲去定海尤近先生  
遯跡山中忽一道士過之曰吾子誠高士然喪亂之辰負  
此剛腸恐爲意外之變所折也吾授子以藥有急用之先  
生亦不以爲意度其藥閣中未幾時果當厄因念道士言  
姑試之則神効乃稍稍習之已冷泠然輕舉矣又念當此  
身世不如長往但未知所向須臾見洞天瑤草非復人間  
道士緩步而出握手笑曰此羅浮也當與君居於此顧先  
生之家不知則相與求之山巔海澨間消息屏絕以爲死  
矣一日先生忽降於里人之庭告以道士顛末於是其家  
始大驚先生所作詩畫至今藏者呼爲陳仙人筆跡  
云全氏非謾語者觀此足見重陽遇異人之不妄

酥醪洞主曰明之遺老以薙髮令嚴多隱於僧若華亭

許譽卿會稽章正宸嘉魚熊開元桐城方以智仁和金

堡丹徒錢邦芑輩不可勝數而開元隱黃山名正志號

檗菴以智隱青原名無可號藥地堡隱丹霞名今釋號

淡歸又皆能提倡宗風其為黃冠者鄧大臨外無幾人

矣此亦道教不振之一因也

國朝道士除張天師外承恩寵者嘯亭雜錄載有

婁近垣雍正時封妙應真人此外不多見婁嘉善人以

嘉興府志考之蓋正一派嘯亭雜錄又載華山道士云

年九十餘望之若仙本滿洲人從經略莫洛征王輔臣

洛為輔臣誘殺畏罪隱華山又喬道人清臞鶴立談兵

家事歷歷如繪或云年大將軍潰卒曾戰青海者又西

城玉皇閣道士云能預知和相死期在海定寺祈晴頗

有小驗後以其惑眾逐出境外不知所終

三人俱不詳為何派或亦全真道士也

馬道人真一不知何里人居華山王刁洞以峯巔自號或

稱以瘋顛亦漫應之洞有三道人居其中無榻几因石為

牀無經書文字無藥物丹爐其弟子常光等椎魯無知不

談燒煉黃白等法不為齋醮符錄等事清靜全真以為教

能冬月以雪為沐浴氣蒸蒸如暑值旱官迎之署不立壇

不焚香但索酒大飲飲間雨下如注或問吉凶矢口而答

無不奇中或預言天下事不爽忽一日謂其弟子曰將東

出關矣旋去不知所在或有遇之關外者言峯巔事尤多

奇云

國朝李楷河濱文集○國朝錢謙益初學文集

有萬尊師傳云尊師名國樞江西人天啟丁卯登峨

眉山廬紫雲授以薩真人神霄青符五雷秘法戊辰之楚

有馬全真者補衣苴履乞食湖湘問目之而問曰子從峨

眉老人來耶萬語之故馬曰然清則符靈派清則法靈子

傳法而不傳派其猶未也此馬全真當即馬真一廣陽雜

記云馬真一者龍門法嗣世號顛仙言其不死

今猶在遼東此真一出關後事蓋國初猶存

道人王萊陽名清正龍門法嗣馬真一嫡派也孫宗武于

華陽時已與之友知其人甚悉今興復京都白雲觀嘗言

華陽道派有二一太華一王刁也太華宗陳希夷王刁宗

邱長春 廣陽雜記○白雲觀於明末當被燬至國初王  
清正來居乃再興復清正蓋華陽道士白雲觀道  
派用龍門當  
自清正始也

王常月字崑陽嘗恢復江甯虎踞關之隱仙菴菴爲嘉靖  
五年嶗山道人高玄禮結草名竹林道院崇禎二年易今  
名崑陽有道行曾寓京都白雲觀後化於菴中李皋爲之  
銘 國朝朱緒金陵詩徵○江甯府志隱仙菴相傳陶  
宏景隱居於此故名明時冷鐵脚尹蓬頭嘗遊此菴  
譚守誠號心月楚之鄆縣人爲兒時相貌不凡嬉于庭有  
紺髮朱顏黃冠客負蒲團策杖過其廬見而異之曰此子  
骨氣異常他日可肩吾大道也語畢忽不見家人皆怪之  
明亡遂棄家爲道士徧遊名山歷叅耆宿頗有得一日遇  
王崑陽相見如故遂偕往武當山中傳秘密精義操修二

十餘年無晷刻少懈崑陽知其有所得以龍門心印付之  
屬曰爾得吾道當以度人爲急度一人證道卽積無量功  
德也于是守誠游行天下以救拔爲主誘人于至道丁寔  
告誡勿使墮落旁門後至江南見有根器者衆乃於隱仙  
菴設教焉誨人以忠孝爲本以誠靜爲用其徒從者幾千  
人康熙己巳語諸學人曰吾將逝矣當在某月日也至期  
沐浴更衣說偈曰一心靜極萬緣消獨露眞容月正高自  
在希夷堪湛寂龍門法律柏林操端坐而化得其學者黃  
州詹太林晉柏也 國朝陳鼎  
留溪外傳  
朱太侗字冲陽崑山人讀書好古得詹真人法句容管重  
光青浦諸嗣郢與之遊直以師事之問飛昇黃白之事卽

叱日外道也主江都瓊花觀最久不與傳類伍及見蜀之  
余生遂訂為莫逆交唱咏甚得著有山居樂集

王豫江國朝

蘇詩徵○詹真人當即詹太林以龍門派核之太倥亦當  
譚守誠弟子其示人詩云習靜歧儒俗居山異市塵斷齋  
忘大欲辟穀想真傳有著成迷妄無心合聖賢瘦節兼野  
鶴隨境度流年玩其詩蓋亦證道者 國朝張邦伸錦里  
新編余畚字生號純菴青神人明大司馬肅敏公裔世  
授衛指揮千戶值流寇亂為黃冠避難江東賣詩文自給  
嘗寓吳門客舍自言為梅花作主人康熙乙丑仲夏晚化  
於瓊花觀時七十九按生亦當全真道士又吳震方述  
異記諸嗣郢順治辛丑進士習玄門之學築精室余山號  
九峯山人晚年無疾騎鶴化去後忽寓書崑山葉詡菴寄  
仙茅三兩詡菴發書皆出世語所寄藥則當歸也未幾鄉  
人來京聞其已卒乃大駭明年詡菴卒於京按嗣郢亦有  
得於全真之學者

直隸天津衛天妃宮道士上官常明者不知何許人也平  
生端慤誠樸無纖毫偽行全真功年六十餘一日命其徒

購壽缸一具昇之庭道士喜入缸坐而試之曰正好亦不  
須擇日以炫世去了罷即瞑目長往矣其徒以缸停于室  
中三年其師弟素無行好飲欲舉其屍瘞之士以缸易酒  
及啟寂無屍焉大驚遂患毒瘡徧醫不愈天津有客吳門  
者歸省遇道士于淮陰市中客素識道士因問何日離天  
津道士答曰三月某日客出銀五星齋道士道士授以方  
曰子師弟患瘡乞付之命依方修治即愈也遂別去客抵  
家過天妃宮詢其師弟師弟告之故始知啟缸之日即道  
士所云三月某日也

留溪外傳

酥醪洞主曰自馬真一至上官常明皆龍門法嗣其派  
則真常守太清也餘不爾者或全真他派或未舉其名

活死人者姓江名本寔四川人家素封明亡散家財棄妻子入終南學仙十年得其道遂遨遊四海既而止妙高峯從閻老人結廬煉金丹又十年丹成座下弟子百餘人推荆溪陳留王爲首能駕雲往來能水面上立能峭壁間行嘗縛虎爲騎出入市中活死人怒呼而責之日所貴乎道者清靜無爲也無爲而至于無聲方臻衆妙之門故曰有聲之聲延及百里無聲之聲延及四海今汝所行皆有爲也有爲則駭世惑俗豈清靜道哉于是陳留王乃盡棄其術掩關息坐三年然後請見活死人大說日子可以授吾大道矣既授乃集羣弟子告曰吾聞成功者退今吾道既已得人吾將隱矣乃命掘一土穴山半僅可容身活死人

入居之命以土掩毋使有隙但朝夕來呼我可耳既埋羣弟子如命朝夕往呼之活死人在土中必大聲應三年呼之不應矣羣弟子乃樹之以碣曰活死人之墓

留溪外傳  
○按此全

真派入終南學重陽  
之學而爲是名者

郭長彬字去勝平湖人母夢呂祖授桃食之而孕年十三從許自修爲道士及長受法于窮隆山施諒生遊句曲龍虎諸名山得五雷傳歸住松塵道院行法屢驗晚至京師棲白雲觀觀爲元邱長春蛻化之所一日悉更衣履靜息踰日不飲食視之則已化豫親王親至瞻禮爲龕以葬之題曰拂袖白雲相國張玉書題曰長春接軌後弟子孫楚昂迎龕歸葬啟之顏色如生

嘉興府志

貝師本恆字常吉淮陽人年十七禮武當袁正遇爲師後  
訪王崑陽授修真戒律康熙己亥結茅武康之高池山參  
玄靜煉得祖炁符籙祈者響應羣以真人呼之雍正己酉  
雲間朱椿通守金華患瘡久藥不瘳服師符卽愈朱以祿  
壽嗣問師笑答曰祿當顯位壽幾耆耄嗣則艱得而晚也  
後皆如言乾隆乙丑餘杭人延主洞霄宮丁卯臨安疫獄  
囚皆病師禳之得安次年虎晝搏人獵者亦被傷師步遇  
虎喝勿傷人虎頰首避去患遂息師之學宗郝太古真人  
先明易道之原晚造神仙之域其徒陳仁恩奉教三十年  
得明其旨撰周易參義黃老旨歸二書及將辭世出柿數  
枚留餉龍門道侶陸清微卽口占偈云六六經翻立洞九

道七

道七

九丹傳鉛汞仔細端求一竅子緜密調停兩鼻孔胡麻飯  
破袖襪七十餘秋江南江北咄八百龍沙一一客畢竟到  
頭甚麼說歸來無事任逍遙何處風光不自得仁恩侍旁  
書甫畢而師化乾隆二十三年十一月十八日也壽七十  
一化後二十三日面色如生適清微至自當湖遂爲封龕  
藏本宮之左  
國朝梁同書類羅庵集洞霄宮貝法師傳  
郭名世賢字榮芳瀏陽人少孤貧事母至孝爲經人以養  
性不茹葷血母卒屏人事遊武當山得辟穀術及歸隱瀏  
東大光洞補師巖乾隆三十八年除夕坐化巖中年四十  
五肉身不壞目灼灼有光鄉人廟祀之歲旱禱雨輒驗咸  
奏請封昭顯真人按武當爲全真派此郭世賢亦全真道  
士也  
道人李赤腳四川人客陝西涇陽古寺中年歲不可考貌

道七

道七

極清癯似四五十歲人自言明末曾充兵丁談李自成張獻忠爭戰事甚詳乾隆三十年間尙在從未以文字示人亦不知其能書也尹相國繼善聞其名疑有黃白之術遣人致書相召答書云乞人浪跡涇干苟延殘喘岐黃之理素未究心卽老莊之書亦不寓目惟知飢來出門食後靜坐而已忽承慕道之誠兼訊治病之術大約混俗卽脫俗之法養生卽長生之方况天上神仙人間宰相一而二二而一者也若使服藥燒丹閉門辟穀是所謂道在邇而求諸遠事在易而求諸難也來京之約不特野心久戀白雲亦且老病有如黃葉後會有期不必相強字甚遒勁似晉唐人手筆尹得書嘆曰此野仙自全其真者也再訪之

已扃戶出矣五十三年秋忽謂其徒曰予將逝矣汝等葬

我於寺旁五日後有代予題碑者至五日畢撫軍秋帆至

其地聞之題曰赤脚大仙之墓

國朝張邦  
伸錦里新編

京師白雲觀中有老神仙者異人也先是辛酉之歲京師大水有老道人前一二年內不知自何處來其人寡言語少飲食恆露坐別院浮圖下風雨暑寒未嘗少間人飲食之亦不辭或經日忘設亦弗索也比洪濤瀾漫城外村落苦飢官舫載餅餌啖之觀中人二日一食粥皆有餓色視老道人晏如也然已不食數日矣道人於是方起坐顧謂道衆曰我久溷此間勞衆供養今滿地橫流苦無覓食處我當爲衆人謀活計矣飄然竟去不及數旬言自塞外回

橐中裝約千餘金付觀主亦不言所自來也是後道人遂  
住觀中郝蘭皋言余登閣披經曾遇道人送客方丈外踰  
闕便回足不及階鬚髮蒼然兩目炯炯青焰有光其巨倍  
常心異之顧未及接談而去心恒養養不忘也後詣觀還  
書因便謁之時住小菴觀主遣人更迭候門道人方危坐  
於時殘暑未消輕紵尙御道人衣做緼襜褕多補綴痕客  
至則候門人值迎送道人但俛首爲恭而已余訊之答言  
陝西同州人姓王氏本農家子未嘗從師授讀不識丁也  
聞談道者欣然諦聽略知大意遂棄家浪遊亦未遇異人  
指授也心無繫累隨處皆安性耽靜坐習近自然亦不復  
知飲食寒煖也不曉文字絕無思慮如斯而已叩以道術

答言不解睇其貌還如送客時所見唯眼孔之大似稍遜  
於前叩以此故復云不知問以前時所見亦云未喻大抵  
合眼靜坐收視內觀調氣練精故其神全耳余不能測其  
所至因追記如此時距接坐傾談又復十餘年矣道人今  
亦不知何往也

國朝郝懿  
行曬書堂集

王至清字樸山江寧上元人隱仙菴道士嘗有詩云入山  
何所見古墓森松柏春風復秋風年光何其迫不見古來  
人但見日西夕菴中古梅老桂傳爲六朝時物一日梅桂  
枯萎樸山忽蛻去著有江上吟草

金陵詩徵參  
國朝符葆森正雅集

酥醪洞主曰元以後至於 國朝全真派徧布於江南  
各行省惟粵無聞然震宇訪碑錄有臨桂棲霞洞全真



觀記云楊璧撰至元十七年是元初全真教已逮粵西  
矣今粵東羅浮及會城諸道觀詢其派又皆全真也其  
來不知何自余寓居羅浮酥醪觀知觀中爲龍門派出  
於會山山師其法嗣亦多有道行茲舉其著者彙記於  
後使後之來者知所興起焉

會師一貫號山山不詳何許人其師李清秋龍門派第十  
代孫得至人傳授真訣一貫傳其學恬修道成以符藥救  
人康熙間入羅浮築道場於紫霞洞五十五年廣州旱當  
道邀請求雨雨大注因委管沖虛觀山中五觀餘四曰酥  
醪曰九天曰黃龍曰白鶴俱延爲住持後遷紫霞洞道場  
於酥醪洞令弟子柯陽桂主之師自居沖虛未幾羽化葬

沖虛觀前獅子山師遺有佩劍能辟邪有病祟者取劍懸  
卧內卽愈今尙存

柯師陽桂號善智福建泉州府晉江縣人家世仕宦師幼  
習舉子業然性耽清靜慕老莊之學弱冠棄家游羅浮禮  
會一貫爲師羅浮酥醪洞相傳安期生與神女於此會燕  
醉後呼吸水露化爲酥醪故名晉葛洪隱羅浮會建北菴  
宋代舊有觀遭亂久廢一貫與師擇今地重爲興築師操  
行清潔住山三十餘年度弟子百餘人乾隆十年六月二  
十日無疾而化年五十三門人瘞於觀右之銅鼓嶺歲時  
臨奠焉

童師復魁號慵菴浙江紹興府會稽縣人柯陽桂再傳弟

子也乾隆辛亥入道羅浮酥醪觀時年三十八矣精進有  
得復雲游二十載乃歸衆共推爲住持制府重之復舉任  
道會司之職師御下嚴正山中道釋俱奉命惟謹客有避  
跡入羅浮者所歷寺院款給優厚詢其故俱云童住持預  
言有佳客至不敢慢及至觀相蓄如弟子掃一室令靜處  
戒毋出入住久見師服食精贍揮黃金如土亦不審阿堵  
物何來也一日呼客語曰君可歸矣別時付以隱語不可  
解及歸乃釋然其神異多類此觀下路出麻姑峯及佛子  
隩俱險峻不可騎師養一馬每過輒蹠躐自喜人共危之  
師不恤也嘉慶辛酉九月初三日坐化壽九十八其徒江  
本源葬之柯陽桂塋次香山黃培芳題其墓稱曰仙師南

海謝蘭生爲像贊曰游衍洞天一何自在簸弄耳目一何  
狡獪老子之道其猶龍歟誰其乘雲上下從歟嘻酣睡一  
菴其慵歟其非慵歟觀此其道行可知已賴介生師云童  
慵菴師同時住  
觀者何復川師一百二歲金莊馬師亦幾及百歲師兄弟  
師弟子松齡鶴算容與一門余所親見也故世稱觀多壽  
人

江師本源字瀛濤號松竹山人廣州府番禺縣人入道羅  
浮酥醪觀繼童復魁爲住持師有戒行通儒釋之學能詩  
文士大夫喜從之遊以觀爲浮山最深處乃闢佛子隩塗  
徑築玉液亭爲義漿以濟行者又以廣州白雲山蒲澗安  
期生嘗采藥其間復倡築安期仙祠晚營生壙於觀左之  
望岡墩嘉慶丙子毘陵湯貽汾來遊爲題其壙曰江瀛濤

藏於此化後門人卽痊仙蛻於壙中賴介生師云瀛濤建鄭仙祠於蒲澗祠左  
則雲泉山館南海仲令擬增廣之既拆卸不及建而去任瀛濤旋亦昇化於酥醪於是其徒孫楊教善踵爲之比舊更宏做香火日盛歷二十餘年一日山館中童子忽聞叩門聲啟視則麗然胖道士請姓名曰江某俄而由小門出往仙祠童子請導不許明日童子見楊師而述之

楊愕然問狀則真瀛濤也當時相傳以爲得仙云

賴師本華號介生原名洪禧字疇叶廣州府東莞縣人初習舉業爲諸生以詩名後入羅浮酥醪觀禮童復魁爲師習靜一室不與人接墊江李惺游羅浮慕其人請與相見師以耳聾辭惺悵然題詩於壁曰山外浮來一窳公山中却有賴癡翁癡翁不與窳公見知道癡翁耳詐聾後年八十餘化於觀中其子孫迎遺蛻返葬鄉間有浮山新志紅棉館詩鈔傳於世國朝正雅集張永堅號雲根新會人羽士住羅浮白鶴觀有無心齋吟草番

周劉彬華謂其骨清法密亦山中能詩者

余師明志號笑塵子原名慈鶴廣州府順德縣世家子父宦於蜀產焉少隨父任讀儒書通玄理弱冠卽有出塵之想回粵後試弗售娶妻生子矣旣而曰世途險詐室家累人何鬱鬱久居此同治甲子年踰不惑遂入道羅浮之酥醪觀杜門不出惟焚香斗室晝夜誦道德黃庭等經雖風雨寒暑無少輟嘗謂吾儕修道丹藥本無可憑不若誦經以存心使心無欺念還吾本體自能超凡入聖神游太虛住山十年計所誦經不啻數千萬遍每語人曰吾誦經有得血氣調和冬不慄暑不汗飢渴可忘疾病罔作其效如此一日具齋邀道侶告別云明晨下山衆恠之夜漏三下

經聲猶未輟天將曉啟戶視之跌坐榻上化矣榻前遺書

諸道侶勉以修身立命并囑刊其語錄訓世時甲戌八月

也師緘默寡言誦經之暇惟以詩自娛道侶彙梓之名曰

笑塵子集集中小詩云雪冷風寒步亦稀繞闌別有好奇心

機枯枝一一芟除去免使春來壞蝶衣荒隄偏

仄欠寬平難使摩肩互迭迎偶遇鶴來還却避不妨讓路

與他行久住仙都歲月深山閑風味熟沈吟年年最好三

冬候爛煮畦中白菜心別傳香味透心田山上蟠桃幾顆

懸意欲摘來還自壽却忘今歲是何年此可想其所得已

化時余

親見之

